

傷寒論 序

余每覽越人入虢之診，望齊侯之色，未嘗不慨然嘆其才秀也。

怪當今居世之士，曾不留神醫藥，精究方術，上以療君親之疾，下以救貧賤之厄，中以保身長全，以養其生，但競逐榮勢，企踵權豪，孜孜汲汲，惟名利是務，崇飾其末，忽棄其本，華其外而悴其內，皮之不存，毛將安附焉？

卒然遭邪風之氣，嬰非常之疾，患及禍至而方震慄，降志屈節，欽望巫祝，告窮歸天，束手受敗，

賫百年之壽命，持至貴之重器，委付凡醫，恣其所措。

咄嗟嗚呼！厥身已斃，神明消滅，變為異物，幽潛重泉，徒為涕泣，痛夫！舉世昏迷，莫能覺悟，不惜其命，若是輕生，彼何榮勢之云哉？

而進不能愛人知人，退不能愛身知己，遇災值禍，身居厄地，蒙夢昧昧，蠢若游魂，

哀乎！趨世之士，馳競浮華，不固根本，忘軀徇物，危若冰谷，至于是也。

余宗族素多，向餘二百，建安紀年以來，猶未十稔，其死亡者，三分有二，傷寒十居其七。

感往昔之淪喪，傷橫夭之莫救，乃勤求古訓，博采衆方，撰用 素問，九卷，八十一難，陰陽大論，胎臚藥錄，并平脈辨證，爲傷寒雜病論 合十六卷。
雖未能盡愈諸病，庶可以見病之源，若能尋余所集，思過半矣。

夫天布五行，以運萬類，人稟五常，以有五藏，經絡府俞，陰陽會通，玄冥幽微，變化難極。

自非才高識妙，豈能探其理致哉

上古有 神農，黃帝，岐伯，伯高，雷公，少俞，少師，仲文。中世有 長桑，扁鵲，漢有 公乘陽慶，及倉公。下此以往，未之聞也。

觀今之醫，不念思求經旨，以演其所知，各承家技，終始順舊。

省病問疾，務在口給，相對斯須，便處湯藥，按寸不及尺，握手不及足，人迎趺陽，三部不參，動數發息，不滿五十，短期未知決診，九候曾無髣髴，明堂闕庭，盡不見察，所謂窺管而已。夫欲視死別生，實爲難矣。

孔子云，生而知之者上，學則亞之，多聞博識，知之次也。余宿尚方術，請事斯語。